

# ЯАХОБЫН БИЧСЭН ЗАХИДАЛ

## Өмнөх үг

Яахоб энэхүү захидлыг бичихдээ баян ба ядуу хүмүүсийн байдал мөн тэдний хоорондын харилцаа, хүний зан чанар, итгэл болон хэл яриа гэх мэтийн асуудлуудыг хөнджээ. Энэ нь хүний амьдралд маш чухал ач холбогдолтой захидал юм. Үүний дотроос хүний итгэл болон зан чанарын тухай асуудал онцгой чухал байр суурийг эзэлнэ. Үүнд, Ертөнцийн Эзэний замаар баттай явахын тулд түүнд зөвхөн итгэх нь хангалттай бус бөгөөд басхүү түүнд таалагдах сайн сайхан зан чанартай байх нь чухал юм гэдгийг энд зааварчилсан байна.

### Мэндчилгээ

**1-Р БҮЛЭГ.** <sup>1</sup>Ертөнцийн Эзэн болон Их Эзэн Есүс Христийн үнэнч зарц болох Яахоб миний бие нь энд, тэндгүй тархсан Израилийн арван хоёр овгийнхтой адил Ертөнцийн Эзэний бүх хүмүүст хандан энэхүү мэндчилгээг хүргэж байгаа болно.

### Итгэл болон тэсвэр тэвчээр

<sup>2</sup>Ахан дүүс минь ээ! Янз бүрийн бэрхшээл сорилт тулгарвал, түүнийгээ баяр баясгалантай зүйлд тооцож байгтун! <sup>3</sup>Учир нь гэвэл, сорилт туршилтыг тийнхүү давсаныхаа үр дүнд итгэл чинь хөдлөшгүй бат болно гэдгийг та нар мэдэж байгаа билээ. <sup>4</sup>Хөдлөшгүй бат итгэлээ хадгалан, түүнийхээ үр дүнг амьдралдаа бүрэн дүүрэн харуулж байгтун! Тийнхүү та бүхэн нас бие гүйцэх мэт итгэлээрээ өсч бойжихдоо хүнд байвал зохих сайн сайхан зан чанараар огт дутахгүй болно.

<sup>5</sup>Хэрвээ та нарын дотроос хэн нэг нь мэргэн ухаанаар дутаж байгаа бол, түүнийг Ертөнцийн Эзэнээс гуйгтун! Тэрбээр хэнийг ч зэмлэн буруушаалгүй өгөөмөр сэтгэлээр өгдөг учраас гуйсан юмыг чинь зайлшгүй өгөх болно. <sup>6</sup>Харин түүнээс юм гуйж байхдаа хариу авна гэдэгтээ эргэлзээгүй бат итгэж байх хэрэгтэй. Учир нь, эргэлзэж байгаа хүн бол салхины аясаар давлагаалах далайн долгион мэт тогтворгүй сэтгэлтэй байна гэсэн үг юм. <sup>7—8</sup>Тиймэрхүү хоёрдмол сэтгэлтэй, амьдралын зам нь байнга тогтворгүй, муруйж хазайж байдаг хүн Их Эзэнээс ямар нэгэн юм хүлээн авна гэж бодохын ч хэрэггүй болно.

### Баячууд болон ядуучууд

<sup>9</sup>Есүст итгэгчдийн дунд байгаа ядуу дорд хүмүүс нь Ертөнцийн Эзэний мөнхийн улсад орно гэдгээрээ бахархаж байх нь зөв юм. <sup>10</sup>Мөн

тэдний дотор байгаа баячууд ч гэсэн эд хөрөнгийн талаар бусдаас онцгой биш болсондоо бахархаж байх нь зөв. Яагаад гэвэл, баян хүн ч гэсэн хээрийн цэцэг мэт түр зуур амьдраад л үгүй болдог билээ. <sup>11</sup>Зуны халуун наран шаарахад хээрийн өвс гандаж хатан, навч цэцэгс хагдарч унаад тансаг сайхан гоо үзэмж нь ул мөргүй алга болдгийн адилаар баян хүн эд хөрөнгөө арвижуулах гэж зүтгэсээр яваад гэнэт нас бардаг болой.<sup>1</sup>

<sup>12</sup>Амьдралын сорилт туршилтыг тэсвэрлэн даваад итгэлтэй хэвээр үлдсэн хүн л ерөөлтэй! Учир нь, тийм хүн сорилт туршилт бүхнийг даван туулаад өөрт нь хайртай болсон хүмүүст өгөхөөр Ертөнцийн Эзэний амласан мөнхийн амьдралыг титэм болгон авах болно.

### Сорилт туршилт

<sup>13</sup>Гэмт байдалд уруу татагдсан хүн «Ертөнцийн Эзэн намайг ийнхүү сорин туршлаа» гэж хэлэх хэрэггүй юм. Яагаад гэвэл, Ертөнцийн Эзэнийг өөрийг нь ёрын муу юмаар уруу татах аргагүйн адилаар тэр өөрөө ямар ч хүнийг гэм хийлгэхээр уруу татдаггүй билээ. <sup>14</sup>Хүн зөвхөн өөрийнхөө хүсэл бодолд хууртагдан мэхлэгдэж улмаар түүндээ эзэмдүүлэн урхидуулсныхаа үндсэн дээр л гэмт байдалд уруу татагддаг болой. <sup>15</sup>Ийнхүү хүний сэтгэлд гэм хийх хүслийн үр тогтож улмаар тэр нь хүүхэд төрөхийн адилаар хожмын нэгэн өдөр биеллээ олдог ажээ. Төрсөн хүүхэд өсч том болохын адилаар хүний хийсэн гэм улам их болсоор эцэст нь үхэлд хүргэдэг болно.

<sup>16</sup>Дотны хайртай ахан дүүс минь, тиймээс та нар өөрөө өөрсдийгөө бүү мэхлэгтүн! <sup>17</sup>Бидний амьдралд ирсэн сайн сайхан бүхэн, бидэнд зүгээр өгсөн төгс сайхан бэлэг бүхэн дээрээс ирдэг билээ. Тэр бүхэн нь орчлон хорвоогийн гэрэл гэгээг бий болгосон Ертөнцийн Эзэнээс

ирдэг бөгөөд гэхдээ тэр нь гэрэлтэй адилаар хувирч өөрчлөгдөн, сүүдэртэнэ гэж хэзээ ч байхгүй. <sup>18</sup>Ертөнцийн Эзэн биднийг өөрийнхөө хүслээр үнэн сургаалдаа итгүүлээд дахин төрсөн хүн мэт болгон цоо шинэ амьдралыг өгсөн билээ. Учир нь, түүний бүтээсэн бүхний дотроос бид л хамгийн тэргүүний байр суурийг эзлэх ёстой байсан ажээ.

#### Сургаал сонсоод гүйцэлдүүлж байгтун

<sup>19</sup>Дотны хайртай ахан дүүс минь, үүнийг сайтар ойлгож аватун! Бусдын үгийг сонсохдоо та нар уриалгахан бөгөөд түргэн байж харин ярихдаа бодлоготой бас уурлахаа урьдал болгодоггүй байх хэрэгтэй. <sup>20</sup>Яагаад гэвэл, хүн уур уцаараасаа болоод Ертөнцийн Эзэний хүсч буй үнэнч шударга зан чанарыг харуулж чадахгүйд хүрнэ. <sup>21</sup>Тиймээс бузар булай бүхнийг өөрсдөөсөө зайлуулан, хорон муу үйл явдал газар авч тарахыг нь зогсоон, Ертөнцийн Эзэний сургаалыг төлөв даруухнаар хүлээн зөвшөөрөөд түүний дагуу л амьдарч байгтун! Амь, сүнснийг чинь мөнхийн зовлонгоос аварч чадах тэрхүү сургаалыг Ертөнцийн Эзэн сэтгэл зүрхэнд чинь өөрөө суулгаж өгсөн билээ.

<sup>22</sup>Харин та нар Ертөнцийн Эзэний сургаалыг зөвхөн сонсдог бус бас дагадаг хүмүүс болох хэрэгтэй. Зөвхөн сонсох нь хангалттай гэж үзээд өөрийгөө хуурч мэхлэх хэрэггүй юм. <sup>23</sup>Учир нь, тэрхүү сургаалыг сонсоод дагахгүй байгаа хүн нь өөрийгөө толинд харж байгаа хүнтэй л адил болой. <sup>24</sup>Тийм хүн нүүрээ ажиж харчихаад эргээд явахдаа ямар байдалтай байснаа ч таг мартаах ажээ. <sup>25</sup>Хувь хүнд эрх чөлөө авчирдаг сургаал буюу Ертөнцийн Эзэний төгс ариун сургаалыг та нар судалж сурахдаа түүнийг зөвхөн сонсоод мартчихдаг бус харин амьдралдаа хэрэгжүүлдэг хүмүүс болбол түүнээс ерөөл авна.

<sup>26</sup>Хүн өөрийгөө бат итгэлтэй гэж боддог хирнээ амаа татаж чадахгүй байгаа бол, биеэ хууран мэхэлж байгаа хэрэг мөн. Тийм хүний итгэл нь ямар ч үр дүнгүй өнгөрнө. <sup>27</sup>Ертөнцийн Эзэн—Эцгийнхээ өмнө гэмгүй ариун, бузар булай юмгүй амьдарна гэдэг нь зовлонд унасан өнчин үрс, бэлбэсэн эхнэрүүдэд тус болж басхүү хүн төрөлхтний гэмт амьдралд оролцон өөрийгөө бузарлахгүй явна гэсэн үг болой.

#### Бусдыг бүү ялгаварла

**2-Р БҮЛЭГ.** <sup>1</sup>Анд нөхөд минь, та нар яруу алдарт Их Эзэн Есүс Христдээ нэгэнт итгэдэг уч-

раас бусдыг хэзээ ч ялгаварлан үзэж болохгүй. <sup>2</sup>Үүнд, нэг өдөр алтан бөгжтэй, тансаг сайхан хувцастай хүн хурал дээр чинь ороод ирлээ гэж бодоход бас уранхай ноорхой хувцастай ядуу хүн ч ороод ирж болох юм. <sup>3</sup>Гэтэл та нар тэр сайхан хувцасласан хүнд илүү анхаарал тавин «Та дээшээ сууж болгооно уу?» гэсэн хирнээ ядуу хүнд хандан «Чи тэндээ зогсч бай!» гэх юмуу эсвэл «Наанаа, шалан дээр суучих!» гэж хэлбэл, <sup>4</sup>сэтгэл дотроо хүмүүсийг ялгаварлан үзэж, ёрын муу үзэл бодолтой шүүгч шиг боллоо гэсэн үг мөн.

<sup>5</sup>Дотны хайртай ахан дүүс минь, сонсогтун! Энэ дэлхийн ядуу хоосон хүмүүсийн дотроос Ертөнцийн Эзэн өөрийнхөө хүмүүсийг сонгож авахдаа тэднийг итгэлээр нь арвин баян байлгаж улмаар өөрт нь хайртай болсон хүмүүст өгөхөөр амласан мөнхийн улсаа өв залгамжлуулан өгөхөөр шийдсэн нь үнэн билээ. <sup>6</sup>Гэтэл та нар болохоор ядуу хүнийг дорд үзэн гутаах гэж үү? Үнэн хэрэгтээ баячууд л та нарыг дарлан дарамталж байдаг бус уу? Тэд л та нартай зарга мэдүүлэн шүүх рүү чирч байдаг бус уу? <sup>7</sup>Өөрсөдтэй чинь холбоотой болсон Есүсийн хүндэт сайхан нэрийг басамжлан доромжилж байдаг этгээдүүд чинь тэд л биш гэж үү?

<sup>8</sup>Та нар Ертөнцийн Эзэний сургаалд буй «Өрөөл бусдыг өөрийн адил хайрлагтун!» гэсэн тэрхүү эрхэм дээд хуулийг үнэхээр даган биелүүлж<sup>1</sup> чадвал, амжилт ололт олох болно. <sup>9</sup>Харин та нар хүнийг ялгаварлан үзвэл, түүгээрээ гэм хийж байгаа хэрэг бөгөөд Ертөнцийн Эзэний тогтоосон хуулийг зөрчсөн хэрэгт орлоо гэсэн үг юм. <sup>10</sup>Учир нь, Ертөнцийн Эзэний тогтоосон бүх хуулийг дагасан хирнээ зөвхөн нэг л зүйлийг нь зөрчсөн хүн бусад бүх хуулийг нь зөрчсөн гэмтэй болж тооцогдоно. <sup>11</sup>Яагаад гэвэл, Ертөнцийн Эзэн «Бүү завхайр» гэж хэлэхдээ бас «Хүн бүү ал» гэж хэлсэн билээ. Тиймээс завхайрч байгаагүй хирнээ хүн алсан хүн бол Ертөнцийн Эзэний тогтоосон хуулийг зөрчсөн хэрэг мөн.<sup>12</sup> Тиймээс юу ч хийж, юу ч ярьсан Ертөнцийн Эзэнтэй харьцах эрх чөлөөг хувь хүнд олгосон тэрхүү хуулийн дагуу хожим шүүгдэх болно гэдгээ санаж байх хэрэгтэй. <sup>13</sup>Учир нь, бусдад өршөөлгүй хандаж байсан хүнийг Ертөнцийн Эзэн өршөөлгүй хатуу шүүн шийтгэнэ. Харин ял шийтгэлийг өршөөл энэрэл ялан дийлдэг нь үнэн билээ.

<sup>1</sup> «Хууль» 19.18

<sup>12</sup> «Чөлөөлөгдсөн нь» 20.13—14; «Дэлгэрэнгүй хууль» 5.17—18

### Хоосон итгэл хэнд ч ашиггүй

<sup>14</sup>Анд нөхөд минь, хэрвээ хүн өөрийгөө итгэлтэй гэсэн хирнээ итгэлийнх нь үр дүн амьдралд нь гарахгүй байгаа бол, ямар ашиг байна? Тийм хүнийг итгэл нь аварч чадах уу? <sup>15</sup>Хэрвээ Есүст итгэдэг нэг нөхөр чинь өмсөх хувцасгүй, идэх хоолгүй болбол, <sup>16</sup>хэн нэг нь түүнд хандан «За, яв. Идэх хоолтой, өмсөх хувцастай болоорой!» гэж хэлсэн хирнээ хэрэгтэй тусламжийг нь үзүүлээгүй бол, үүнд ямар ашиг байна? <sup>17</sup>Тиймээс үр дүнгүй итгэл гэдэг бол үхдэл мэт ашиггүй зүйл билээ.

<sup>18</sup>Гэтэл зарим нэг нь «Чи бол итгэх чадвартай. Харин би бол юм хийх чадвартай хүн» гэж хэлж магадгүй юм. Тэгвэл «Үйл ажил болон үр дүнгүй итгэл гэж юу болохыг тэр хүн надад харуулаг л даа. Хариуд нь би түүнд итгэл гэж юу болохыг үйл ажлаараа харуулъя» гэж хэлнэ. <sup>19</sup>Ертөнцийн Эзэн цорын ганц байдагт бид итгэдэг гэж та нар хариулах байх. Тэр чинь их сайн хэрэг байна. Гэтэл муу ёрын сүнснүүд хүртэл үүнд итгэн шийтгэлээс нь айн дагжиж байдаг шүү дээ. <sup>20</sup>Тэнэг мунхаг хүмүүс ээ! «Үйл ажилгүй итгэл нь үр ашиггүй зүйл юм» гэдгийг та нар надаар батлуулах гээд байгаа юм уу?

<sup>21</sup>Бидний өвөг эцэг Аврахаам нь Яйцхаах хүүгээ өргөл болгон чулуун дээр тавихдаа л<sup>1</sup> үйлдэж хийсэн тэр зүйлээрээ Ертөнцийн Эзэний өмнө өөрийгөө цагаатгуулаагүй гэж үү? <sup>22</sup>Зөвхөн түүний үйлдэж хийсэн зүйлээс л болоод итгэл нь хир зэрэг бодитой болж харагдсаныг одоо та нар ойлгов уу? Үйлдэж хийсэн зүйлийнх нь үндсэн дээр л түүний итгэл бүрэн төгс болсон ажээ. <sup>23</sup>Тийм учраас л Ертөнцийн Эзэний сургаалд буй «Аврахаам Ертөнцийн Эзэнд итгэсэн учраас гэмгүйд тооцогдов» гэсэн үг<sup>2</sup> үнэн бодитой болсон юм. Түүнээс нь болоод л Ертөнцийн Эзэн Аврахаамыг «Миний анд нөхөр» гэж нэрлэсэн билээ.<sup>3</sup> <sup>24</sup>Тиймээс хүн зөвхөн итгэлийн үндсэн дээр биш харин түүнийгээ үйл ажлаараа харуулсны үндсэн дээр Ертөнцийн Эзэний өмнө гэмээ цагаатгуулдгийг та нар харж байна уу?

<sup>25</sup>Үүний нэгэн адилаар Израильчуудын илгээсэн хоёр туршуул эрийг янхан бүсгүй Рахаав хүлээж аваад гэртээ оруулан улмаар замаа буруулан зугтахад нь туслахдаа үйлдэж хийсэн

энэ ажлаараа л Ертөнцийн Эзэний өмнө гэмээ цагаатгуулсан биш үү?<sup>4</sup>

<sup>26</sup>Амь, сүнсгүй бие нь үхдэл болдгийн адилаар үйл ажлаар батлан харуулаагүй итгэл нь үхмэл зүйл юм.

### Хэл яриагаа захирч сурагтун

**3-Р БҮЛЭГ.** <sup>1</sup>Анд нөхөд минь, та нарын дотроос олон хүн сургаал заадаг болох гэсний хэрэггүй юм. Яагаад гэвэл, сургаал заадаг хүнийг Ертөнцийн Эзэн хожим бусдаас илүү хатуу ширүүн шүүх болно. <sup>2</sup>Учир нь, хүмүүс бид олон удаа алдаа гаргадаг билээ. Хэлж ярихдаа нэг ч удаа алдаа мадаг гаргадаггүй болсон хүн л төгс төгөлдөр хүн болжээ гэсэн үг юм. Тийм хүн өөрийнхөө биеийг бүхэлд нь хазаарлан захирч чадаж байна гэсэн үг болно. <sup>3</sup>Морины аманд хазаар хийгээд л бид хүссэн зүгтээ түүнийг дуулгавартай залж чадах бөгөөд тийнхүү бүхэл бүтэн адгуусыг дуртай зүгтээ явуулж чаддаг. <sup>4</sup>Усан онгоцыг аваад үз л дээ. Тэр нь овор ихтэй<sup>5</sup> бөгөөд хүчит салхины аясаар туугдан явдаг зүйл боловч далайчин хүн түүнийг өчүүхэн жижиг залуураар<sup>6</sup> дуртай зүгтээ залан чиглүүлж чаддаг билээ. <sup>5</sup>Үүнчлэн хүний хэл нь өчүүхэн бага эрхтэн боловч асар том үйл явдлын тухай бахархан сайрхаж чадна. Өчүүхэн бяцхан цогноос болоод үүссэн түймэрт өргөн их ой цөлмүүлдэг бус уу? <sup>6</sup>Хүний хэл яриа нь гал түймэртэй адил ажээ. Бидний биенд байгаа эрхтнүүдийн дотроос хэл яриа л бүхэл бүтэн гэмт ертөнцийг бүрдүүлж байдаг. Тийнхүү хүний биеийг тэр бүхэлд нь бузарлан, төрөлх гэмт чанар дээр нь үндэслэн түймрийн гал мэт эзэмдэн аваад хордуулах нь мөнхийн зовлонгийн галаар түүнийг ноцоосонтой адил болой. <sup>7</sup>Учир нь гэвэл, бүх төрлийн араатан амьтад, жигүүртэн шувууд, хэвлээр явагчид болон тэнгис далайд шумбан сэлэгчдийг барьж аваад номхруулан захирч болох бөгөөд тэдгээрийг хүн төрөлхтөн эрхшээлдээ оруулан захирсаар ч ирсэн юм. <sup>8</sup>Гэтэл хүн хэл яриагаа захирч чадахгүй ажээ. Хүний хэл яриа нь номхотгох аргагүй агсам догшин бөгөөд ёрын муу чанартай, үхлийн хорыг агуулж байдаг зүйл болой. <sup>9</sup>Бид хэл яриагаараа Их Эзэн, Ертөнцийн Эзэн—Эцгээ магтан хүндэлж байдаг хирнээ түүнтэй адил төстэйгээр бүтээгдсэн хүмүүн төрөлхтнийг харааж байдаг нь үнэн юм.<sup>10</sup> Хүн нэг л амтай боловч түүнээс нь ерөөл ч гардаг,

<sup>1</sup> «Эхлэл» 22.1—14 Аврахаам төрсөн хүүгээ хүртэл өөрт нь өргөл болгон барихаас буцаагүйг Ертөнцийн Эзэн хараад өргөлийг нь болиулаад хүүг нь амьд үлдээсэн байдаг.

<sup>2</sup> «Эхлэл» 15.6

<sup>3</sup> «Судрын дэд» 20.7; «Яашах» 41.8

<sup>4</sup> «Ишуугаа» 2.1—21

<sup>5</sup> Усан онгоцны дарвуул юм.

<sup>6</sup> Усан онгоцны зүг чигийг тохируулах жолоо юм.

<sup>7</sup> «Эхлэл» 1.26

хараал ч гардаг ажээ. Анд нөхөд минь, энэ бол байж болшгүй зүйл мөн! <sup>11</sup>Булгийн усны нэг эхээс цэвэр болон бохир ус зэрэг гардаг уу? <sup>12</sup>Анд нөхөд минь, инжир мод чидун жимс ургуулж чадах уу? Усан үзмийн мод инжир жимс ургуулах уу? Тэгвэл, давс хужиртай уснаас цэвэр ус гарахгүй нь бас үнэн болно.

#### Жинхэнэ цэцэн мэргэн ухаан Ертөнцийн Эзэнээс ирдэг

<sup>13</sup>Та нарын дотор аливаа юмыг ухааран ойлгож чадах цэцэн мэргэн хүн байна уу? Тэгвэл, үнэнч шударгаар амьдран юу ч хийхдээ төлөв даруу, цэцэн мэргэн байдлыг харуулж байх хэрэгтэй. Энэ бол жинхэнэ цэцэн мэргэн ухаан мөн. <sup>14</sup>Харин сэтгэл зүрх чинь атаархал хорсол, бусдаас дээр гарах гэсэн хүслээр дүүрэн байгаа бол, өөрийнхөө цэцэн мэргэн байдлаар сайрхах хэрэггүй юм. Тэгвэл, чи үнэнийг худал болгон гуйвуулж байгаа хэрэг мөн. <sup>15</sup>Тэр бол Ертөнцийн Эзэний өгсөн цэцэн мэргэн ухаан биш бөгөөд зөвхөн хүн төрөлхтний дотроос үүссэн гарсан мэргэн ухаан болой. Тэр бол муу ёрын сүнсний мэргэн ухаан юм. <sup>16</sup>Яагаад гэвэл, атаа хорсол болон хувийн зорилготой хүмүүс нь эмх журамгүй байдал, төөрөгдөл самуурал үүсгэн ёрын муу бүхнийг үйлдэж байдаг. <sup>17</sup>Харин Ертөнцийн Эзэний өгсөн мэргэн ухааныг өөрийн болгосон хүмүүсийн сэтгэл зүрх нь гэмт бодлоор бузартаагүй байдаг билээ. Тэд эв найрамдлыг тогтоон, өрөөл бусадтай эелдэг зөөлөн харьцаж, аливаа юмны учир шалтгааныг сонсоход үргэлж бэлэн байдаг. Тэд энэрэнгүй сайхан сэтгэлийн үүднээс бусдын төлөө сайн сайхныг бүтээж байдаг бөгөөд басхүү хэнд ч тал тохой таталгүй, хуурамч зан гаргалгүйгээр юм бүхэнд өөрийнхөө үнэн сэтгэлийг харуулж байдаг болно. <sup>18</sup>Эв найрамдал тогтоох хүсэлтэй хүн эе, эвийн үрийг цацахад түүний үр дүнд үнэнч шударга байдал бий болдог.

#### Ертөнцийн Эзэнд амьдралаа тушаагтун

**4-Р БҮЛЭГ.** <sup>1</sup>Тэмцэл, тулалдаан юунаас эхэлдэг вэ? Ямар учраас та нарын дунд маргалдаан, тэмцэлдээн гардаг вэ? Та нар зөвхөн өөрсдийнхөө улайрсан хүслээс л болоод өөр хоорондоо тэмцэлдэж эхэлдэг бус уу? <sup>2</sup>Хүсэл байгаа боловч түүндээ хүрч чадаагүй учраас хүн бусдыг алж хядахдаа хүрдэг. Шуналд автаад түүнийг

гээ өөрийн болгож чадаагүй учраас хүн тэмцэлд орж, тулалдаан үүсгэдэг. Гэтэл, та нарт яагаад хүссэн юм чинь олдохгүй байна вэ? гэвэл, зөвхөн Ертөнцийн Эзэнээс гуйгаагүй учраас л тэр билээ. <sup>3</sup>Гэхдээ та нар гуйсан юмаа ч түүнээс хүлээн авч чаддаггүй ажээ. Яагаад гэвэл, та нар буруу зорилгоор гуйдаг хүмүүс мөн. Та нар зөвхөн өөрсдийнхөө улайрсан хүслийг хангахын тулд л Ертөнцийн Эзэнээс юм гуйдаг ажээ. <sup>4</sup>Итгэл найдваргүй амьтад минь! Энэ дэлхийн амьдралтай эвсэлдэн зохицно гэдэг нь Ертөнцийн Эзэнийг эсэргүүцнэ гэсэн үг болохыг та нар мэдэх үү? Тиймээс энэ дэлхийн амьдралтай эвсэлдэн найрсан хүн өөрийгөө Ертөнцийн Эзэний дайсан болгож байгаа хэрэг мөн. <sup>5</sup>Ертөнцийн Эзэн хүн төрөлхтөнд зүрх сэтгэл өгсөн билээ. Өгсөн тэр зүрх сэтгэлийг нь хүн өөрөөс нь өөр юманд зориулахад тэрбээр маш их хардан харамнаж байдаг. Ертөнцийн Эзэний сургаалд энэ тухай тодорхой хэлсэн байдаг нь утга учиргүй зүйл гэж үү? <sup>6</sup>Гэхдээ тэр бидэнд хайр ивээлээ илүү ихээр харуулж байдаг учраас «Ертөнцийн Эзэн ихэмсэг бардам хүнийг эсэргүүцэж харин төлөв даруу хүнд хайр ивээлээ харуулж байдаг» гэсэн үг түүний сургаалд бий.<sup>11</sup>

<sup>7</sup>Тиймээс та нар өөрсдийгөө Ертөнцийн Эзэнд бүрэн гүйцэд захируулж байгтун! Адгийн муу ёрын сүнснийг эсэргүүцэж байгтун! Тэгвэл, тэр та нараас зугтан зайлах болно. <sup>8</sup>Та нар өөрсдөө Ертөнцийн Эзэнтэй ойртон дотносохоор ирвэл, тэр бас өөрөө та нартай ойр дотно болно. Гэмт хүмүүс ээ! Гэм хийж бузартсан гараа угааж цэвэрлэгтүн! Хоёрдмол сэтгэлтэй хүмүүс ээ! Сэтгэл зүрхээ шулуутган ариутгагтун! <sup>9</sup>Хир зэрэг гэмтэй болохоо ойлгоод эмгэнэн гашуудаж, мэгшин уйлагтун! Инээд хөөрөө эмгэнэл гашуудал болгогтун! Баяр баясгалангаа гуниг гутрал болгогтун! <sup>10</sup>Тийнхүү Их Эзэний өмнө өөрсдийгөө төлөв даруу болговол, тэр өөрөө та нарыг өөд нь татаад өргөн авах болно.

#### Бусдыг яллахаас болгоомжлогтун

<sup>11</sup>Анд нөхөд минь, бие биенээ бүү муучилж бай! Нэг нөхрийнхөө тухай муучлан ярьж, ялладаг хүн бол Ертөнцийн Эзэний хуулийг<sup>12</sup> муучлан яллаж байгаа хэрэг мөн. Хэрвээ та нар тийнхүү Ертөнцийн Эзэний хуулийг яллаж байгаа бол, түүнийг дагах ёстой хүмүүс нь биш харин шүүгч нар нь гэсэн үг болно. <sup>12</sup>Гэтэл

<sup>1</sup> Инжир — дулаан орны мод, түүний шүүсэрхэг амттай жимс. Чидун жимсний модны хальс нь ногоон, цэцэг нь цагаан, анхилам үнэртэй нэг зүйл ургамал, үүнээс тос гаргаж авдаг.

<sup>11</sup> «Сургаалт үгс» 3.34

<sup>12</sup> «Олны дунд хов хутган ийш, тийш тэнүүчилж үл болно» — «Хууль» 19.16 «Өрөөл бусдыг өөрийн адил хайрлаж бай» гэсэн — «Хууль» 19.18

тэрхүү хуулийг бидэнд тогтоож өгсөн бөгөөд түүнийхээ дагуу биднийг аврах ч эрхтэй, хөнөөх ч эрхтэй цорын ганцхан шүүгч л байдаг болой.<sup>1</sup> Харин нэг нөхрөө яллах эрхтэй хэмээн үзэж буй хүн чи өөрийгөө хэн гэж бодоод байгаа юм бэ?

#### Өөрөөрөө бардамнахаас болгоомжлогтун

<sup>13</sup>«Өнөө, маргаашдаа би тийм хотод очоод тэндээ бүтэн жил суун, арилжаа наймаа хийж мөнгөтэй болно» гэх мэтээр ярьдаг хүмүүс ээ! Та нар энэ үгийг сонсогтун! <sup>14</sup>Маргаашийн тухай чи огт мэдэхгүй шүү дээ. Хүний амьдрал гэж юу вэ? Учир нь, хүн чи өөрөө түр зуур л бий болоод замхран арилдаг манан будан мэт зуурдын амьдралтай бус уу?<sup>15</sup> Тиймээс хүн тэгж ярихын оронд «Хэрвээ Их Эзэн хүсвэл, бид амьд байж улмаар ийм, тийм юм хийнэ» гэж ярьсан нь дээр болно. <sup>16</sup>Гэтэл та нар Их Эзэний тухай юу ч бодолгүйгээр өөрийнхөө хүчинд л эрдэж найдан, сайрхаж явдаг ажээ. Тиймэрхүү сайрхал бол ёрын муу үйл хэрэг мөн.

<sup>17</sup>Басхүү ямар нэгэн юмыг хийх нь зөв гэж үзсэн хирнээ хийгээгүй өнгөрсөн хүн гэм хийж байгаа хэрэг мөн.

#### Баячуудад өгсөн сануулга

**5-Р БҮЛЭГ.** <sup>1</sup>Баячууд аа! Та нар энэ үгийг сонсогтун! Хожим үзэх зовлон гунигаа бодоод та нар одооноос уйлан орилсон чинь дээр болно! <sup>2</sup>Тэрхүү шийтгэлээс өмнө эд хөрөнгө чинь элэгдэж муудаад тансаг сайхан хувцас чинь хүр хорхойд идэгдэнэ. <sup>3</sup>Алт, мөнгө чинь зэвдэн идэгдэж улмаар тэрхүү зэвэрч муудсан эд хөрөнгө чинь та нарыг буруутгах гэрч баримт болно шүү дээ. Түүнээсээ болоод та нар Ертөнцийн Эзэнээс шийтгэл авч халуун гал мэт мөнхийн зовлонд орох болно. Шийтгэл авах эцсийн тэр өдрийнхөө гэрч баримт болгох гэж л та нар эд хөрөнгө хурааж байгаа билээ.<sup>11</sup> <sup>4</sup>Хар л даа! Та нар тариан талбайдаа хүн ажиллуулчихаад хөлсийг нь өгөлгүй залилж мэхлэн, аль болохоор хойш нь татан аргацааж байдаг учраас тэд чинь гомдол мэдүүлэн орилж байна. Ургацыг чинь хурааж байсан тэр хүмүүсийн гомдол

үй түмэн ер бусын дайчидтай Мөнхийн Эзэний сонорт хүрсэн л байгаа шүү дээ.<sup>14</sup> <sup>5</sup>Энэ дэлхийд байхдаа та нар баян тансаг бөгөөд зугаа цэнгэлтэйгээр амьдарч байгаа улс мөн. Нядлах гэж буй малыг бордохын адилаар та нар сэтгэл зүрхээ өөхлүүлсээр мөнхийн шийтгэлд орох тэр өдөртөө бэлдэж байгаа хүмүүс болно. <sup>6</sup>Та нар үнэнч шударга хүмүүсийг шийтгүүлэх нь байтугай алуулж байсан хүмүүс мөн. Тэр хүмүүс чинь тэр үед та нарыг эсэргүүцэн сөргөөж чадахгүй байсан билээ.

#### Зовлон бэрхшээл болон тэсвэр тэвчээр

<sup>7</sup>Тиймээс анд нөхөд минь, Их Эзэний эргэж ирэх өдрийг тэсвэрлэн тэвчиж хүлээгтүн! Хар л даа! Тариачин хүн газрынхаа үр өгөөжийг гартал тэсвэрлэн хүлээж байдаг бус уу? Тийм хүн хаврын анхны бороо, намрын сүүлийн борооноос арвин их ургац авахын тулд тэсвэртэйгээр хүлээж байдаг билээ.<sup>8</sup> <sup>8</sup>Үүний адилаар та нар бас тэсвэр тэвчээртэй байж сурагтун! Их Эзэний ирэх цаг ойртож байгаа учраас итгэлтэй бөгөөд зоригтой байцгаагтун!

<sup>9</sup>Ахан дүүс минь! Ертөнцийн Эзэнээр өөрсдийгөө яллуулахгүй байя гэвэл, нэг, нэгнийхээ эсрэг бүү гомдол гаргаж бай. Хүн төрөлхтний тэрхүү шүүгч нь хүн бүрийн сэтгэл зүрхийг шалгаж шүүхээр ирэх цаг дөхөж байгаа нь илэрхий бус уу?

<sup>10</sup>Анд нөхөд минь! Зовлон бэрхшээл туулахдаа тэсвэр тэвчээртэй байсан хүмүүсийн үлгэр дууриалал бол Их Эзэний нэрээр үгийг нь дамжуулдаг байсан өнө эртний зарлагууд юм. Тэднийг үлгэр жишээ болгож аваад үзэгтүн! <sup>11</sup>Хар л даа! Хувирашгүй үнэнч байж чадсан хүмүүсийг бид ерөөлтөйд тооцдог бус уу? Иовын хувирашгүй үнэнч чанарын тухай та нар сонссон шүү дээ.<sup>12</sup> Их Эзэн өөрөө ихэд энэрэнгүй бөгөөд өршөөнгүй сэтгэлтэй учраас эцэст нь түүнд хэрхэн тусалсныг та нар мэдэж байгаа билээ.

<sup>12</sup>Анд нөхөд минь! Нэгэн зүйлийг чухалчлан хэлэхэд хөх тэнгэр, хөрст дэлхий болон өөр ямар нэгэн юмаар тангараг тавих хэрэггүй юм. Харин Ертөнцийн Эзэний өмнө буруутан болж яллуулахгүйн тулд ямар ч үед «тийм» эсвэл «үгүй» гэсэн үгийг л үнэнээр нь хэлж байгтун!<sup>13</sup>

<sup>14</sup>. «Дэлгэрэнгүй хууль» 24.14—15

<sup>15</sup>. Тэр нутагт өвөл нь хүйтэрдэггүй бөгөөд 10—11-р сар болон хавар 4—5-р сард бороо ихтэй болдог учраас намрын борооны дараа тариачин хүн уринш хагалан үр тарьж, хаврын борооны дараа ургац хураадаг ажээ.

<sup>16</sup>. «Иов» 1.21—22; 2.10; 42.10; «Дуулал» 103.8

<sup>17</sup>. «Матай» 5.34—37

<sup>1</sup>. Ертөнцийн Эзэн гэсэн үг бүхий.

<sup>11</sup>. «Сургаалт үгс» 27.1

<sup>13</sup>. «Матай» 6.19



**Ертөнцийн Эзэнтэй ярихын ач холбогдол**

<sup>13</sup>Та нарын дотроос зовлон туулж байгаа нэг нь Ертөнцийн Эзэнтэй ярьж байгтун! Жаргалтай нэг нь Ертөнцийн Эзэнийг магтан дуулж байгтун! <sup>14</sup>Сулдаж доройтсон хүн байгаа бол, Есүст итгэгчдийн бүлгийн ахлагч нарыг дуудан Их Эзэний нэрээр тос дусаалган мялаалгаад өөрийнхөө төлөө Ертөнцийн Эзэнээс гуйлгуулж байгтун!<sup>15</sup>Тэдний итгэлтэйгээр гуйсан гуйлтын үр дүнд тийм хүн хүнд байдлаасаа гарах болно. Их Эзэн тэр хүнийг сэргээн босгоод хэрвээ гэм хийсэн бол, түүнийг нь өршөөн уучлах болно.

<sup>16</sup>Тиймээс үйлдэж хийсэн гэмээ өөр хоорондоо нуулгүй хэлж бие, биенийхээ төлөө Ертөнцийн Эзэнээс гуйж байвал, та нар сэргэн босцгооно. Үнэнч шударга хүний гуйлтын үр дүн асар их үр нөлөөтэй байдаг билээ. <sup>17</sup>Үүнд, Элий—Яах нь үнэндээ бидний адил эгэл жирийн нэг хүн л байсан юм. Гэтэл тэрбээр бо-

роо оруулж өгөхгүй байхыг Ертөнцийн Эзэнээс цуцалтгүй шургуу гуйснаас болоод тэр нутагт гурван жил хагасын турш борооны дусал унаагүй билээ. <sup>18</sup>Дараа нь тэр Ертөнцийн Эзэнээс бороо оруулж өгөхийг гуйхад нь хөх тэнгэрээс хур бороо ороод хөрст дэлхий үр өгөөжөө өгч эхэлсэн болно.<sup>19</sup>

**Төөрөлдсөн нөхөртөө тусалж байгтун**

<sup>19</sup>Анд нөхөд минь, та нарын дотроос хэн нэг нь үнэн замаасаа гажиж завхрахад нөгөө нь түүнийг буцаагаад зөв замд нь орууллаа гэж бодъё. <sup>20</sup>Тэгвэл, тэр гэмт хүнийг буруу замаас нь гаргаад зөв замд нь буцааж оруулсан уг хүн нь нэг нөхрөө мөнхийн зовлонгоос авраад зогсоогүй<sup>III</sup> үйлдэж хийсэн асар олон гэмийг нь Ертөнцийн Эзэнээр өршөөлгөн уучлуулсан хэрэг мөн.

<sup>I</sup> «Маарх» 6.13; «Луух» 10.34

<sup>II</sup> Элий—Яах МЭӨ 850 оны үед амьдарч байв. «Хаант улсын дээд» 17.1; 18.1,42—45

<sup>III</sup> «Сургаалт үгс» 10.12; «1 Пётр» 4.8